

لايف جديد "شهر شعبان"

الحمد لله وأشهد أن لا إله إلا الله وحده لا شريك له وأشهد أن محمدًا عبده ورسوله صلى الله عليه وسلم.

أما بعد أهلاً ومرحباً بكم في لايف جديد من لايفات يوم الاثنين،
النهاردة اختارنا موضوع لطيف أتمنى يكون الصوت واضح
يعني، مع دخول شهر شعبان بلا شك الإنسان بتجيله خواطر كثير،
يمكن قضية شهر شعبان قضية معروفة يعني.. أكثرنا حافظ
أحاديث كثير لكن على أرض الواقع كإننا مش حافظين حاجة
يعني، يعني في ناس مش عارفة إن إحنا في شعبان أصلاً وفي
ناس عارفة وكأنها مش عارفة..

عندنا مستويين من الناس:

1. ناس مش عارفة أصلاً إن إحنا في شهر شعبان هو ميعرفش
إحنا في يوم كام أصلاً، ميعرفش إحنا شعبان دخل ولا لسه.
2. وفيه ناس عارفة نظرياً إن إحنا في شهر شعبان لكن على
أرض الواقع عملياً بالنسبة للأداء بتاعه هو كإنه ميعرفش
حاجة.

اللي مش واضح إن في أي فرق عنده بين شعبان وبين رجب وبين
أي حاجة، كل حاجة عنده شبه بعضها.

إحنا يا جماعة لازم يعني نستعد إن إحنا في موضوع خطير جداً..
خطير جداً فعلاً بنتكلم في شهر كما قال النبي عليه الصلاة
والسلام:

(تُرفع فيه الأعمال إلى الله وأحب أن يُرفع عملي وأنا صائم)

يعني عمل السنة كله بيُعرض الآن في شعبان.

ويمكن كنت ضربتكم مثال يمكن سمعته مني قبل كده إن إحنا عاملين شعبان كدة زي الغلابة يعني زي الطالب البليد.. الطالب البليد اللي على قد حاله، اللي في آخر السنة عايز يقدم مشروع للدكتور هو طول السنة مُقصر زينا كلنا، يعني أنا مثلاً لما قدمت مشروع.. أنا فاكّر إحنا اشتغلنا مشروع في آخر السنة كالعادة يعني أي طالب في كلية الطبيعي بتاعه بيشتغل في المشروع في الآخر وبيلكلها كدة وبيقول إيه.. إن شاء الله الدكتور طيب وهيعدينا يعني، بس هو علشان يبقى عنده دم شوية بدل ما هو كدة كدة المشروع في الضايع وهو عارف إنه عامل أداء نص كم يعني فبيقول يعني نعوض كدة بالشياكة يعني، بمعنى إن إحنا هنحاول إن إحنا نعمل إيه.. إخراج كويس للمشروع فهنلبس شيك أوي نلبس بدل يا جماعة اتفقوا البديل يعني لموا نفسيكم شوية والبسوا بدل يعني حتى إيه.. يبقى منظر كويس شوية قدام الدكتور تمام، عايزين نعمل البريزنتيشن كويسة، عايزين نعمل نفسنا فاهمين إحنا كاتبين إيه، عايزين نعمل بقى الكتاب نطلع كتاب فخم جداً نصرف كثير قوي على الكتاب وألوانه وطباعته وشكله ورسمته ومش عارف إيه، وعايزين بقى نيجي بدري وعايزين نجيب للدكتور هدية وإحنا جايين وبتاع، كل اللي بيعملوه ده ليه؟

كل ده علشان عارفين إن الدكتور عارف إن المشروع تعبان، الدكتور عارف إن المشروع تعبان وهو دكتور.. دكتور المادة يعني مش هتضحك عليا أو مش هتخدعني مهما حاولت تجمل باين الشغل ضعيف يعني باين الشغل على القد، بس اللي بيحصل كالعادة في كل الكليات وده حصل معايا وحصل مع غيري إن غالباً الدكتور بيقدّر يعني إن انت يعني بتحاول تبان شكلك كويس وتقدم حاجة شكلها كويس.

فبيحصل الآتي إن هو دكتور بيطلع راجل كريم وبيقدر كل المنظر اللي إحنا عملناه ده، وفي الآخر أغلب الطلبة بياخدوا امتياز. رغم

إن المادة نفسها يعني لو اتحاسبت انت على المحتوى بتاع المشروع نفسه متجيش جيد يعني.. ممكن تسقط أصلاً بس يعني جرت العادة في الكليات إن الدكتور لما بيلاقي الناس اهتمت وبتاع رغم إن أنتم على قدكوا فأكيد يعني العمل ده مش مش هيملى عين دكتور المادة، والدنيا إيه بتعدي وبتمشي والطلبة بتنجح بل أحياناً فعلاً الدكتور بيديهم امتياز.

← والله المثل الأعلى والله المثل الأعلى.. إحنا في شعبان عاملين زي زي إيه؟ زي الغلبة دول.. اللي هما جايين بعمل ضعيف آخر السنة خلاص مفيش فرصة تاني والآن بنقدم النهاية خلاص، بنقدم يعني وعارفين اللي فيها.. عارفين إن في يعني صلوات يعني تكاد لا تُقبل، في معاصي كتير، في آثام، في زلل، في خطأ، في تقصير في في.. كل حاجة بايظة فاللي نقدر نعمله إن إحنا يعني نحاول يبقى شكلنا كويس وإحنا بنقدم المشروع.

وأنا بقدم آخر السنة الليلة بتاعتي دي كلها يبقى شكلي على الأقل كويس يعني متبقاش جامع بين سوء الأداء وسوء التقديم يعني عيب، فأنا كل شغلانتي إن أنا بحاول يبقى شكلي كويس.

طيب شكلك يبقى كويس إزاي؟

شكلك يبقى كويس إنك تكون مُتلبس بطاعة أثناء عرض مشروعك، أثناء عرض عملك على الله.

طيب ما هي أكثر طاعة ممكن أبقي مُتلبس بيها تقعد معايا وقت طويل أوي؟

أصل أنا مش هعرف أصلي طول اليوم، مش هعرف مثلاً أقرأ قرآن طول اليوم، مش هعرف أذاكر علم شرعي طول اليوم، مش هعرف أحضر دروس طول اليوم، لكن فيه عبادة كدة ممكن تجيب

معايا تلت تربع اليوم مستريح كدة وهتبقى على طول أنا متلبس
بطاعة سواء أنا مركز أو مش مركز هي كدة كدة أنا شغال كويس
وهي الصيام.

عشان كدة كان الصيام هو أفضل شيء يتعمل فى الوقت ده لأنك
انت كدة ضمنت تقريبًا أغلب يومك إذا اطلع الله عليك في أي وقت
سيجداك مُتلبس بطاعة وبالتالي ده هيكون شفاعة عند الله سبحانه
وتعالى، وبالتالي العمل اللي متقبلش يتقبل والذنب اللي كان لسه..
يتغفر، يعني يحصل بقى تعديلات كتير وتحسينات كتير في نتيجة
عملك دوت بفضل الله سبحانه وتعالى، وعشان انت كنت كويس
وبتقدم أداء كويس.

فهي دي الفكرة فلذلك علشان كدة إحنا مش بس المفروض نكون
صيام في شعبان المفروض نُكثِر من العمل الصالح في شعبان حتى
بعد فطارك الدنيا مخلصتش بعد الفطار بقى تحاول تقوم الليل،
تحاول تعمل بقى إيه تطلب علم، المهم إنك تنام ومعملتش حاجة
غلط عشان تاني يوم تحاول تكون صايم، تصوم بقى إيه 15 يوم
في شعبان تصوم 20 يوم في شعبان على قد ما تقدر تصوم في
شعبان علشان دي الفكرة يعني.

إحنا عاملين برضو يا شباب عاملين زي واحد.. مثال تاني سيبك
من الكلية ماشي!

نقول مثال تاني كان واحد عنده قضية والقضية دي هيتحكم فيها أو
اتحكم فيها بالفعل يعني اتحكم فيها، فصاحبنا دوت العادي لما حد
بياخذ حكم في قضية بيعمل إيه؟ بيعمل إستئناف مش كدة! وبعد كدة
بعد الإستئناف ممكن يعمل معارضة وبعد كدة.. بيقد كدة كتير
لغاية ما يبقى خلاص آخر فرصة ليه فيه جلسة أخيرة خلاص دي
آخر فرصة ليك.

إحنا العرض بتاعنا على الله سبحانه وتعالى عامل زي واحد كل

شوية بيستأنف يعني خد حكم في الأول حكم ما.. بعد كدة جه وقت تاني يعني تُعرض الأعمال على الله زي ما جاء في الحديث يومي الإثنين والخميس صح!

الأعمال بتُعرض على ربنا يومي الإثنين والخميس وده في العرض الإِسبوعي وكذلك تُعرض على الله سبحانه وتعالى أعمال الإنسان بشكل سنوي.

هى بتُعرض يوميًا، إسبوعيًا، سنويًا.

يوميًا: في الفجر والعصر قال صلى الله عليه وسلم:

(تتعاقب فيكم ملائكة بالليل والنهار ويجتمعون في صلاة الفجر وفي صلاة العصر ثمَّ يصعد الذين باتوا فيكم إلى ربهم فيسألهم ربهم وهو أعلم كيف تركتم عبادي؟ قالوا يارب أتيناهم وهم يصلون وتركناهم وهم يصلون)

الله.. عرض جميل أوي الملائكة بتجتمع في صلاة الفجر وفي صلاة العصر "يتعاقبون فيكم ملائكة بالليل والنهار في صلاة الفجر وصلاة العصر" فييجي في الصلاة الملائكة بتاعة صلاة الفجر تصعد إلى الله سبحانه وتعالى قال "يجتمعون في صلاة الفجر" عشان هما طالعين نازلين يعني فيه وردية تنزل ووردية تطلع بس الورديتين بيتقابلوا في الفجر والعصر "يجتمعون في صلاة الفجر وفي صلاة العصر فيصعد الذين باتوا فيكم فيسألهم ربهم وهو أعلم"... وده العرض اليومي بقى.. العرض اليومي بيحصل مرتين كل يوم "كيف تركتم عبادي؟" عاملين إيه؟ نص اليوم ده عملوا إيه؟ فيقولوا "أتيناهم وهم يصلون" يعني جينالهم صلاة العصر لقيناهم بيصلوا "وتركناهم وهم يصلون" يعني سبناهم وهما بيصلوا الفجر فده حاجة عظيمة جدًا يعني.

فالإنسان بيخلي باله من نفسه في الفجر والعصر بالذات ياريت تبقي حاضرة وياريت تبقي في أول الوقت تصلي علشان الملائكة

إذا جاءت في صلاة الفجر صلاة العصر متلاقيش تقول والله لأ
منى مصلتش الظهر أصلاً، لأ والله مريم دي مصلتش الفجر، لا
ده محمد مصلاش من إمبراح ده.. تخيل بقى الملايكة طالعة تدي
تقرير لله سبحانه وتعالى صلاة الفجر صلاة العصر يتقال إن إحنا
مشفناكش أصلاً، مشفناهاش أصلاً، فتخيل بقى قُبِحَ هذا التقرير عند
الله سبحانه وتعالى.

فالإنسان يحاول يحرص على الصلاة في وقتها والشباب يصلوا في
المساجد والبنات تصلي في أول الوقت ويحرصون جداً على صلاة
الفجر وصلاة الإيه! صلاة العصر، صلاة الفجر والعصر طبعاً
ورد فيه حديث مشهور قال:

(مَنْ سره أن ينظر إلى وجه الله سبحانه وتعالى غداً فليحافظ على
صلاة قبل طلوع الشمس وصلاة قبل غروبها)

يعني صلاة الفجر وصلاة العصر، فالحفاظ على صلاة الفجر
وصلاة العصر يؤدي إلى أن يرى الإنسان ربه يوم القيامة، نسأل
الله أن يرزقنا لذة النظر إلى وجهه الكريم.

هتقولي طب خلاص أصلي الفجر والعصر بس؟ لأ ما هو اللي
بيعرف يصلي الفجر والعصر سهل عليه يصلي الباقي لأن تقريباً
أصعب صلاتين إنك تحافظ عليهم في وقتهم في اليوم الفجر
والعصر

ليه؟

لأن الفجر طبعاً تبقى وأنت نايم المفروض تصحى، وقتها ضيق
جداً المفروض تصحى أكيد من نومك، إنك تصلّيها في وقتها ده
مش سهل فبيحتاج مجهود، صلاة العصر غالباً بنبقى إما راجعين
من الكلية، راجعين من شغلنا بنشتري حاجات من السوق، في أكل
محطوط هنتغدى، بتطبخ، بتغسل، ففي كعبلة كدة في الوقت ده
فاللي يقدر يحافظ على صلاة الفجر في وقتها صلاة العصر في

وقتها سهل جدًا إن هو يصلي الظهر في وقتها، يصلي المغرب والعشاء من أسهل الصلوات، الإنسان يصلي الظهر والمغرب والعشاء لكن دايماً بيبقى التحدي إزاي هظبط نفسي الفجر والعصر رغم إن أنا ببقى عايز أنام في صلاة الفجر وبرغم إن أنا ببقى متكعبل في صلاة العصر، راجع من شغل مش عارف، راجع من كلية، عندي أكل، عندي طبيخ، عندي مواعين، عندي.. فاللي يقدر يمسك دول حيمسك الباقي.

لكن اللي عايز أقوله إن المهم في عرض يومي على الله سبحانه وتعالى في صلاة الفجر وصلاة العصر فأياك أن تكون عبد قبيح، إياك أن تكون عبد سوء يسأل عنه ربه فيقال له لم نجده.. فيقال له لم نجده، يسأل عنه رب العزة يقول كيف تركتم عبادي؟ أخبار مني إيه؟ ومريم وهدى وإسراء؟ فين يا رب مفيش! مبوصلوش أصلاً مصلوش كانت نائمة في صلاة الفجر صحت بعد الشروق ياه يا لقبح هذا التقرير! فين مصطفى فين أحمد فين محمد فين مجدي؟ لا يارب أصلاً مصلاش العصر ده راجع من الشغل صلى مغرب مع عشاء مع كله مع بعضه بالليل مصلاش الفجر أصلاً صحي الساعة ثمانية الباشا ورايح شغله ومصلاش الفجر يا لقبح هذا التقرير!

طيب التقرير ده طلع فيه تقريرين بيطلعوا كل يوم بعد كدة دي القضية بتاعتك، دي أول جلسة في القضية بتاعتك القضية اليومية اللي هي بتحصل كل يوم بيحصل فيها إستئناف بقى إستئناف الإستمئناف ده بيبقى امتى؟ بيبقى في الأسبوع مرتين

عندك فرصة تستدرك مرتين في الأسبوع يعني هو في مرتين عرض كل يوم دي بداية القضية بتاعتك، بيطلع بقى بذنوبك بمعاصيك بنقصيرك بنقص الصلوات بكل حاجة يجي بعد كده يحصلك إستئناف القضية دي تاخذ إستمئناف:

✓ في أول أسبوع الإستمئناف الأول بيبقى في يوم الاثنين.

✓ والإستئناف الثاني بيبقى يوم الخميس من كل أسبوع.

قال النبي عليه الصلاة والسلام:

(تُعْرَضُ الْأَعْمَالُ عَلَى اللَّهِ يَوْمِي الْاِثْنَيْنِ وَالْخَمِيسِ)

يومي الإثنين والخميس، يوم الاثنين والخميس يبتدي يعرض كل الإِسبوع ثاني على الله سبحانه وتعالى ولذلك إحنا بنصوم الاثنين والخميس يعني ده من أسباب إن إحنا بنصوم الاثنين والخميس. وعشان أعمالنا بتعرض على الله الاثنين والخميس فده ده سبب مهم جدًا غير إن يوم الاثنين أصلًا بنصومه لأن النبي عليه الصلاة والسلام ولد فيه وهو كان يصوم الاثنين لأنه يوم ولد فيه، فعندنا سبب مهم أوي في الاثنين والخميس وسبب زائد في يوم الاثنين وهو ميلاد النبي عليه الصلاة والسلام، فصيام الاثنين والخميس مهم مهم واثنين وخميس خصوصًا لأنها تُرفع فيها الأعمال إلى الله فعلشان كذا هو قال لما سأل عن صيام الاثنين والخميس قال إن الأيام دي بترفع فيها الأعمال إلى الله نفس العلة اللي بنصوم من أجلها شهر شعبان هي نفس العلة اللي بنصوم من أجلها الاثنين والخميس.

فأنا بادعو كل اللي بيسمعني الآن إن احرص على الاثنين والخميس لو حتى في شعبان مش هتصوم كثير صوم الاثنين والخميس يبقى جمعت بين العرض الإِسبوعي والعرض السنوي فصمت شعبان وصمت اثنين وخميس، فنحرص دايماً نصوم الاثنين والخميس، وافتكر الموضوع ده.

طيب يحصل إيه يوم الاثنين والخميس؟

أه يوم الاثنين والخميس لو انت بقى صايم كويس كدة وشكلك كويس يعني ممكن الدنيا تعدي معاك من العرض الإِسبوعي على

طول بس بشرط واحد قال:

(تعرض الأعمال على الله يومي الإثنين والخميس فيغفر لخلقه إلا للمتشاحنين)

لو في بقى ناس متشاحنة بقى ودنيا بقى وبتاع ومخاصمين بعض وزعلانين من بعض ومبيكلموش بعض بقالهم أيام وليالي علشان حاجة تافهة ودنيا..

فيقال أخرا هؤلاء حتى يصطلحا

فيعني نصلح أمورنا يا جماعة ونص شعبان جاي وممكن نتكلم في الموضوع ده بالتفصيل اللايف الجاي قبل ما بييجي نص شعبان بالظبط بس يا جماعة نصفي الأمور ونحاول على الأقل تصفي من ناحيتك، يعني خلي الناحية الثانية هو اللي ظالمك أو هو اللي مخاصمك لكن على الأقل الواحد من نفسه هو يصفى على قد ما يقدر.

طيب.. بعد كدة اتنين وخميس في اتنين وخميس في اتنين وخميس ده الإستئناف الأول بتاعك.

في بقى آخر جلسة.. آخر جلسة خلاص اللي هتخلص كل حاجة، الجلسة دي طولها شهر بقى شهر شعبان كله، عندك الجلسة النهائية اللي هيتحكم فيها خلاص فطبعًا انت كل الفكرة في إيه؟

أنا دلوقتي لما واحد بيبقى عنده قضية لما بييجي يعمل إستئناف أو معارضة لازم يجيب معاه دليل جديد.

تاني

لما أنا بعمل إستئناف في قضية وبطلب إستئناف، أكيد أنا لما هروح للقاضي مش هروحله بنفس الأدلة! وإلا مفيش جديد، لما أعمل إستئناف ومعنا نفس الأدلة يبقى مفيش جديد يبقى هيتحكم

فيا نفس الحكم لكن الفكرة اللي بيعمل إستئناف أو معارضة بيحاول
أثناء الفترة دي يجيب دليل جديد على برائته، أو دليل جديد إن هو
يستحق حكم مُخفف.

فاحنا لازم لما باجي يوم الاثنين والخميس بستانف أو لما آجي في
شعبان بستانف فأنا لازم أقدم دليل جديد على إن أنا كويس، على
إن أنا.. يارب آخذ حكم مُخفف أو براءة أو عفو شامل أو يعني..
إيه الجديد اللي هتعمله لو يوم الاثنين والخميس مش صايم ويوم
عدى زي أي يوم ومفيش أي جديد في حياتك يبقى مفيش جديد في
الحكم صح!

طيب يوم شعبان عدى عادي جدًا، لا في جديد لا صيام ولا صلاة
ولا زكاة ولا صدقات ولا.. مفيش أي حاجة جديد بتعملها يبقى
نفس الأدلة القديمة هي اللي موجودة، فمتوقعش إن هيبقى فيه إيه..
في جديد، فأنت لازم تقدم جديد تثبت بيه.. يارب أنا عبد طيب أنا
قصرت آه بس أنا جاي أقولك معايا دليل إن أنا كويس، إن أنا
كويس يارب بس سامحني عالي فات وتجاوز واقبل و و و
طب إيه الجديد يا عبد اللي عندك علشان يبقى لك حكم جديد أحسن
حالًا؟

يارب أنا صايم يارب أنا صايم يارب أنا صايم ويارب..

النبي عليه الصلاة والسلام سألَه أبو إمامة قال:

دُلني على عمل لا عدل له أي لا مثيل له فقال صَلَّى اللهُ عَلَيْهِ وَسَلَّمَ:

عليك بالصوم فإنه لا عدل له"

أي ليس له مثيل

فقالوا: فكان لا يُرى في بيت أبي أمامة نار توقد طول السنة إلا
نادر جدًا، لما يكون عنده ضيوف بس، كان بيصوم أغلب العام.

وقال رسول الله صَلَّى اللهُ عَلَيْهِ وَسَلَّمَ في الحديث القدسي فيما يرويه عن رب العزة قال:

" كل عمل ابن آدم له إلا الصوم فإنه لي وأنا أجزي به"

يبقى أنا بالتالي لما أتعامل في شهر شعبان أتعامل بنفسية إن أنا واحد آخر فرصة لي يقدم مشروعه، آخر فرصة لي إن هو يستأنف أهم قضية في حياته، قضية نجاته، قضية الجنة والنار، وأنه مطلوب منه في القضية ديت إن هو يُقدم ما يدل على أنه يستحق حكم جديد، فهتقدم إيه في شهر شعبان تثبت بيه أهليتك للحكم الجديد ده؟

فهل انت هتقضي شعبان زي بقية السنة؟

هنقعد بقى نتابع المهرجانات وهنتابع أحدث أخبار الراب وحفلات الراب وأخبار الممثلين وهنقضي الشهر كله في الدوري الأوروبي والدوري الأسباني والدوري الإنجليزي والدوري المصري الممتاز !!!

ولا هيبقى في جديد؟ هل هنقضها برضو تضيع أوقات على الميديا وغيبة ونميمة وسفاهة وتفاهات ولا هيبقى في جديد؟ هيبقى في إفاقة؟ ولا هيبقى فيه شهر مميز؟ نقول لربنا يارب معايا دليل على إن أنا اتغيرت، يارب أنا خلاص أنا واحد جديد.

فلذلك النبي عليه الصلاة والسلام كان يصوم أكثر شعبان أكثر شعبان، وقال أحب أن يُرفع عملي وأنا صائم، فدي دعوة إن إحنا يبقى شعبان بتاعنا مميز مميز جدًا، طيب يمكن الكلام ده اللي أنا قولته.. آه شوفت بقى يا محمد؟ أهو بص أهو ماتشات جاية كتير ماتشات جاية كتير يا محمد والدنيا هتبوظ ومش هينفع كدة، ده لسه ده إحنا إحنا بنطلع من دوري لدوري ومن ديربي لديربي ومن

كلاسيكو لكلاسيكو لغاية ما سيكو راح خالص.. فيعني لازم نفوق
شوية نفوق شوية مفيش وقت والله مفيش وقت فَمَن وجد خيرًا
فليحمد الله وَمَن وجد غير ذلك فلا يلومن إلا نفسه فلا يلومن إلا
نفسه.

ووقتكَ هو أهم حاجة في حياتكَ وقتكَ وقتكَ ضاع خلاص انت
ضيعت رأس مالك يضيع لكن تحافظ على وقتكَ تحافظ على رأس
مالك.

لذلك مِن الحاجات المضحكة بالنسبالي أوي إن أنا بشوف ناس
بيفرحوا لما بيكبروا يعني.. بغض النظر عن موضوع حكم عيد
الميلاد والكلام ده، أنا بتعجب إيه الفرحة في إن أنا كبرت سنة
يعني؟ إيه السعادة في كده؟ يعني إيه اللي يفرحني إن أنا آجي في
يوم أكتشف إن أنا فات مِن عمري سنة؟ أنا لا أفهم يعني ممكن
الأطفال يفرحوا بحاجة زي كدة قبل البلوغ يتفرح بحاجة زي كدة،
لكن واحد الآن يُحاسب الآن بلغ والآن يسأل عن الكبيرة والصغيرة

ما المُفرح في هذا الأمر؟

إذا انسحب وقته وضاع عمره فما الذي يسعده في ذلك؟ لو واحد
عنده ستين مليون جنيه ستين مليون جنيه وكل ما مليون جنيه
تضيع يعمل حفلة ماذا سيُقال عنه سفيه، كذلك إحنا عمرنا ما بين
الستين والسبعين وكل ما بتعدي علينا سنة بنعمل حفلة يا سلام!
حاجة لطيفة خالص فشعبان إذا مر عليك فأنت راح مِن رأس مالك
شهر كامل كان يمكن إنك تعمل فيه أداء رهيب جدًا، وفعلاً صح
زي ما دعاء بتقول إحنا مبنكبرش يا جماعة إحنا بنصغر.. إحنا
بنصغر في الحقيقة لأن أنا في الحقيقة كل ما الوقت بيعدي أنا
بقرب مِن نقطة ثابتة، مفيش حاجة اسمها بتكبر، انت بتصغر
بتصغر يعني اللي فاضل هو اللي بيقل لأن أنا في النهاية بقرب مِن
نقطة ثابتة.

طبيب اللي عايز أقوله النهاردة بقى إيه إضافة للموضوع ده إن شهر شعبان بيوقفني على معنى جميل أوي وهو إن إحنا كل القصة اللي إحنا عايشين فيها ده بنركز على معنى خطير في النهاية هو إن أنا أتقبل.. إن أنا أكون مقبول عند الله سبحانه وتعالى.

تاني إن أنا اتقبل أكون مقبول عند الله سبحانه وتعالى، وده الدرس اللي اتعلمته من شهر شعبان، إيه هو الدرس؟ درس بيقول *اهتم بقبول العمل أكثر من اهتمامك بذات العمل*

إحنا كل دوت في شعبان كل اللي هنعمله علشان ربنا يقبلنا، يبقى أنا بتكلم في معنى ضخم أنا بتعلمه من شعبان هو أنا ليه جاي دلوقتي أنا ليه جاي دلوقتي في شعبان بحاول ألم الدنيا؟ لأن أنا خايف وعارف اللي فيها وعارف إن أنا مقصر وعارف إن أنا بعيد وعارف إن أنا أعمالي مليانة بلاوي تخليها متتقبلش، وبالتالي أنا بحاول ألم الدنيا لكي أقبل.

طبيب طالما انت كدة زي مثلاً إيه نضرب مثال الشاب اللي جه في آخر السنة لم المنهج وراح للدكتور وقدم المشروع والكلام ده واتجبرت معاه بالعافية المفروض السنة الثانية يعمل إيه؟ الطبيعي نفترض إن دي مش آخر سنة يعني عنده سنة بعدها.. الطبيعي السنة اللي بعدها يقولك خلاص أنا اتعلمت من السنة اللي فاتت فأنا مش هزنق نفسي في آخر السنة، ومش هبقى متعلق على إن الدكتور يعديلي والحاجة تبقى خرابانة كدة، لأ أنا من أول السنة هذاكر كويس، من أول السنة هعمل شغل عالي، من أول السنة هذاكر أول بأول عشان متزنقش الزنقة اللي حصلت السنة اللي فاتت وأبقى أقوم حاطط أيدي على قلبي وأقول يارب الدكتور يعني يتجاوز ويعديلي كل الخلل اللي أنا فيه.. صح! العاقل بيقول كدة..

يبقي أنا لما أطلع من شعبان ده أو عمومًا من الآن إلى أن ألقى الله سبحانه وتعالى أنا بتعلم درس جديد، أنا إيه اللي مخليني دلوقتي أيدي على قلبي وخايف على كل أعمال السنة؟

لإن أنا عارف إن أنا قصرت جامد في كل أعمال السنة.

طب ما تيجي من الآن نتعلم زي الطالب اللي دخل تاني سنة وذاكر من أولها علشان متزنقش الزنقة الوحشة دي.

■ آجي أنا دلوقتي من الآن أرفع شعار كما قال بعض السلف:
"كونوا بقبول العمل أشد منكم اهتمامًا بذات العمل".

يعني نطلع من فكرة إن أنا بهتم بأشكال الأعمال بس إن أنا.. صلينا كام ركعة؟ قرأت كام جزء؟ إحنا صلينا تهجد في رمضان ختمنا في رمضان، صلينا بتلات أجزاء في التهجد، صلينا بجزء في التهجد، وزعنا ألف شنطة في رمضان، عملنا.. دخلنا ألف أسرة يتيمة، مية أسرة يتيمة، صلينا حذاشر ركعة بالليل.

يعني وبعدين يعني أعداد أعداد أعداد أعداد لكن صليت إزاي بقى؟ قرأت الجزء أو الجزئين دول إزاي؟ حال قلبك إيه وانت بتطلع الصدقة؟ مش مهم! المهم إن إحنا عملنا الأعداد.

إحنا عايزين نطلع بدرس جديد.. مش هقول مش مهم الأعداد ماشي اعمل الأعداد زي ما انت عايز بس أنا عايز دلوقتي أتعلم، أنا دلوقتي بموت بقول يارب يارب اقبل عملي، فأنا عايز من الآن إن أنا يكون اهتمامي من قبل ما ييجي شعبان الجاي، من دلوقتي بقى علشان شعبان الجاي تكون المهمة أسهل شوية عليا، أنا من دلوقتي بقول يارب أنا أهتم بقبول العمل أكثر من اهتمامي بالعمل.

■ لذلك "فضالة بن عمير" يقول كلمة جميلة أوي: "لأن أكون أعلم أن الله قبل مني مثقال حبة من خردل أحب إلي من الدنيا وما فيها".

قالوله ليه؟

قال: لأن الله يقول في سورة المائدة {إِنَّمَا يَتَقَبَّلُ اللَّهُ مِنَ الْمُتَّقِينَ} يبقى لو قبل مني يبقى دليل إن أنا تقي، فلو أنا كدة تقي دي أسعد حاجة أعرفها في الدنيا.

■ لذلك أحد السلف يقول: "لو أعلم أن الله قبل مني سجدة لتمنيث أن أموت" بس محدش بيعلم.. محدش بيعلم، بس إحنا هنقول في الدرس الجاي العلامات دي.. قال لإن علمت أن الله قبل مني سجدة لتمنيث الموت.

ولما تشوف اهتمام الأنبياء أنفسهم واهتمام السلف بقضية القبول تحس إن انت مقصر جدًا، يعني تعالى كدة نشوف النبي عليه الصلاة والسلام وهو بيقول (اللهم إني أسألك علمًا نافعًا ورزقًا طيبًا وعملاً متقبلًا).

هي المسألة مش فكرة عملاً كثيرًا إنما عملاً متقبلًا، يعني أنا أسجد سجدة ربنا يقبلها أحسن ما أصلي حذاشر ركعة ربنا ميقلهمش، مش كدة؟

تسمع كدة النبي عليه الصلاة والسلام وهو بيقول إيه:

(اللهم تقبل توبتي واغسل حوبتي وثبت حُجتي وأجب دعوتي واهدي قلبي وسدد لساني واسلل سخيمة صدري)

لكن قال في الأول إيه.. "اللهم تقبل توبتي" القضية مش إن أنا توبت القضية إن ربنا يقبل التوبة دي، تمام..

{ثُمَّ تَابَ عَلَيْهِمْ لِيَتُوبُوا إِنَّ اللَّهَ هُوَ التَّوَّابُ الرَّحِيمُ} [التوبة : 118]

اللهم تقبل توبتي واغسل حوبتي وثبت حُجتي وأجب دعوتي واهد قلبي وسدد لساني واسلل سخيمة صدري.. عجيب! عمرك وانت.. كلنا أكيد سجدنا سجديات تلاوة بنعدي على سجدة تلاوة بنسجد اللي

حافظ فينا الدعاء مخدتش بالك وانت بتقول في الدعاء يعني.. أنا هقولك الدعاء هتحس إن انت أول مرة في حياتك تسمعه وعمرك ما ركزت في الكلمة دي رغم إن انت سجدت سجديات تلاوة كتير وقلت الدعاء ده كتير، إحنا نسجد تلاوة بنقول:

"سجد وجهي للذي خلقه وصوره وشق سمعه وبصره بحوله وقوته، اللهم اكتب لي بها عندك أجرًا واجعلها لي عندك ذخراً"

"اللهم اكتب لي بها عندك أجرًا واجعلها لي عندك ذخراً" بنقول إيه بعديها؟ كأنك أول مرة تسمعها، كأنك أول مرة تقولها، كأنك أول مرة تشوف الدعاء دوت وبنقول إيه بعديها؟

"واجعلها لي عندك ذخراً وتقبلها مني وتقبلها مني كما تقبلتها من عبدك داوود".

يا سلام! أنا كإني أول مرة أقول الدعاء ده، وكإني لأول مرة وأنا بسجد التلاوة أخذ بالي من النقطة دي، النبي عليه الصلاة والسلام بيسجد تلاوة، يعني في العادة بيسجدها لوحده، في العادة دي مش مظنة الرياء.. في العادة دي بعيدة عن أي حاجة.. واحد بيقرأ قرآن لوحده سجد تلاوة، مفيش رياء هنا مفيش حاجة ما أنا قاعد لوحدي، بس كل اللي شاغله تقبلها مني.

وكمان ده سيدنا داوود كانت شغلاه برضو، كانت شغلاه، الموضوع ده كان شاغله كما تقبلتها من عبدك داوود كما قال تعالى:

{خَرَّ رَاكِعًا وَأَنَابَ ﴿٢٤﴾ فَغَفَرْنَا لَهُ ذَلِكَ ۖ وَإِنَّ لَهُ عِندَنَا لَزُلْفَىٰ

وَحُسْن مَّآبٍ ﴿٢٥﴾} [ص: 24-25]

زي ما داوود كدة سجد فقبلت منه يارب اقبل مني اقبل مني زي ما قبلت منه، تتقال حوبات يا طارق حوبات يعني إيه؟ يعني ذنبي.

ولما تشوف قول سليمان عليه السلام هو بيقول:

{فَتَبَسَّ ضَاحِكًا مِّن قَوْلِهَا وَقَالَ رَبِّ أَوْزِعْنِي أَنْ أَشْكُرَ نِعْمَتَكَ الَّتِي
أَنْعَمْتَ عَلَيَّ وَعَلَىٰ وَالِدَيَّ وَأَنْ أَعْمَلَ صَالِحًا تَرْضَاهُ وَأَدْخِلْنِي
بِرَحْمَتِكَ فِي عِبَادِكَ الصَّالِحِينَ} [النمل : 19]

الفكرة أن أعمل صالح وترضاه يعني تقبله، قضية خطيرة عند
الأنبياء وقبول العمل يؤثر تأثير غير عادي، يعني لو ربنا قبل منك
عمل بيباركلك فيه.. تاني لو ربنا قبل منك عمل بيباركلك فيه
وممكن البركة دي تمتد عشرات السنين بسبب عمل واحد ربنا قبله
منك

{وَكَانَ أَبُوهُمَا صَالِحًا} [الكهف : 82]

ربنا حفظ الذرية بصلاح إيه الوالد إنه قبل منه.

لكن خد دي أخطر بقى يعني دي أخطر أم مريم عليها السلام اللي
هي امرأة عمران قالت حاجة عجيبة جدًا اعتبرت إن من أعمالها
الصالحة اللي هي مستنياها اللي في بطنها دوت، شايقة إن اللي في
بطنها دوت هو أحد الأعمال الصالحة اللي هي بتدخرها عند الله
سبحانه وتعالى.. تمام

{إِذْ قَالَتِ امْرَأَتُ عِمْرَانَ رَبِّ إِنِّي نَذَرْتُ لَكَ مَا فِي بَطْنِي مُحَرَّرًا
فَتَقَبَّلْ مِنِّي إِنَّكَ أَنْتَ السَّمِيعُ الْعَلِيمُ} [آل عمران : 35]

بص العمل الصالح إزاي ربي إني نذرت.. نذرت نذرت لك ما في
بطني محررًا يعني نذرت لخدمة الدين ولخدمة بيت المقدس، نذرت
لك ما في بطني محررًا، ثم قالت.. مقاتلش بس فنذرت ما في بطني
قالت فتقبل مني فتقبل مني فتقبل مني إنك أنت السميع
العليم،

{فَلَمَّا وَضَعَتْهَا قَالَتْ رَبِّ إِنِّي وَضَعْتُهَا أُنْثَىٰ وَاللَّهُ أَعْلَمُ بِمَا وَضَعْتَ
وَلَيْسَ الذَّكَرُ كَالْأُنْثَىٰ} [آل عمران : 36]

يعني على الله يعني خلاص هي جت أنثى وأنا نيتي إن دي حاجة ربنا ينفع بيها، وهي متعرفش أي شيء ستكون مريم، ومتعرفش مريم هتتجب مين بعد كده، لكن هي قالت يا رب اقبل وخلاص، فلما ربنا قبل بارك.. تاني لما ربنا قبل بارك في العمل فصار العمل أعظم عمل يعني مكنتش تتخيل أبدًا في حياتها إنه ممكن يرزقها، قالت ممكن تطلع بنت صالحة ماشي أقصى حاجة، يعني تخدم بيت المقدس مثلاً ماشي لكن تكون من أعلى أولياء الله على الإطلاق، بل هناك خلاف في نبوة مريم عليها السلام، البعض يقول نبية والبعض يقول من سادات الأولياء والراجح الثاني إن هي مش نبية مفيش من الأنبياء نساء، لكن يكون كمان حفيدها نبي، لأ مش نبي رسول، لأ مش رسول من أولي العزم من الرسل، من أفضل خمسة خلقهم الله سبحانه وتعالى محمد، إبراهيم، موسى، عيسى، نوح. خمسة من أولي العزم من الرسل

يبقى حفيدي واحد من أولي العزم من الرسل ليه؟ أنا عملت إيه؟ كل ده يارب! كل ده ليا أنا؟! تبقى بنتي مريم وحفيدي عيسى عشان قولت بس تقبل مني،

يعني يارب لو انت قبلت مني عمل ممكن ألاقي البركة في حياتي؟ البركة ألاقها في ولادي، البركة ألاقها في أحفادي؟ في أحفادي؟! آه وأحفاد أحفادك كمان.

■ كما قال بعض السلف: "إن الله إذا قبل عملاً بارك ولو في الولد السابع".

فتلاقي البركة تمتد سبحانه الله لدرجة الحفيد، يعني هي دلوقتي بتقول فتقبل مني، ربنا قال:

{فَتَقَبَّلَهَا رَبُّهَا بِقَبُولٍ حَسَنٍ وَأَنْبَتَهَا نَبَاتًا حَسَنًا وَكَفَّلَهَا زَكَرِيَّا}

[آل عمران :

بعد كدة بقى مريم لما قُبلت جه بقى كل الخير اللي بعد كدة وأنجبت عيسى عليه السلام عبد مرضي والقصة اللي انتو عرفينها دي كلها، بس تخيل انت إن إحنا نقدر نقول إن قصة عيسى عليه السلام من أسبابها دعوة جدته، دعوة جدته صح!

جدته كانت بتدعي إن ربنا يقبل بنتها فكان عيسى عليه السلام.

زي ما أخونا بيقولنا أهو قصة إبراهيم عليه السلام بيبنى كعبة في مكان محدش حاسس بيه، محدش شايفه ومفيش حد أصلاً مُطلع عليك انت قاعد في صحراء وبتبني بيت يعني مفيش رياء يعني يُذكر، لكن كل اللي شاغله

{وَإِذْ يَرْفَعُ إِبْرَاهِيمُ الْقَوَاعِدَ مِنَ الْبَيْتِ وَإِسْمَاعِيلُ رَبَّنَا تَقَبَّلْ مِنَّا إِنَّكَ أَنْتَ السَّمِيعُ الْعَلِيمُ} [البقرة : 127]

الواحد بيستغرب والله، الواحد بيطلع عمرة عمرة بس بيرجع شايف نفسه يعني من الصحابة، لو طلع عمرة بيرجع شايف نفسه من الصحابة، ولو طلع حجة طبعاً يبقى خلاص بقى لو مقولتليش يا عم الحج ممكن أعورك، يعني إحنا بنبقى راجعين مغسلين وضامنين جنة، واللي بني الكعبة نفسه كان خايف عمله ميتقبلش، اللي بني الكعبة نفسه اللي هو كل ده في ميزان حسناته كان خايف إن عمله ميتقبلش، وإحنا بنرجع من العمرة خلاص إحنا كدة على الجنة على طول! حاجة عجيبة والله

عشان تعرف الفرق بينا وبينهم هو بيقول وهو بيبنى الكعبة:

{رَبَّنَا تَقَبَّلْ مِنَّا إِنَّكَ أَنْتَ السَّمِيعُ الْعَلِيمُ} [البقرة : 127]

طبعاً ربنا قبل حتى شوف البركة البركة إن هذه الكعبة لم ينقطع عنها العبادة، يعني من يومها لغاية ما تتهدم في آخر الزمان.. سبحان الله يعني.

{وَأَدِّن فِي النَّاسِ بِالْحَجِّ يَأْتُوكَ رِجَالًا وَعَلَى كُلِّ ضَامِرٍ يَأْتِينَ مِنْ كُلِّ
فَجٍّ عَمِيقٍ} [الحج : 27]

إحنا عندنا القبول ده مسألة خطيرة جدًا، خليني أقولكم آخر حاجة
النهاردة عشان مطولش عليكم، وهنكمل المرة الجاية عشان
الموضوع ده رهيب جدًا.

إحنا عندنا القبول على درجتين:

- الدرجة الأولى: إن ربنا يقبل العمل نفسه.
- الدرجة الثانية: إن ربنا يقبل العامل نفسه.

تاني.. الدرجة الأولى إن ربنا يقبل منك العمل، ممكن يقبل عمل
والعمل الثاني ميقلهوش، ممكن في النهاية أعمالك اللي متقبلتش
أكثر من اللي اتقبلت، تبقى انت بين بين كدة مش عارف آخرتها
إيه.

الدرجة الأعلى إن ربنا يقبلك انت نفسك، يعني إيه يقبلك انت
نفسك؟

يعني انت خلاص بقيت عبد بالنسبة لربنا عبد مقبول خلاص
خلاص يعني انتهى الكلام، اتكتبت عند ربنا إنك انت عبد مرضي
مقبول، انت نفسك، بغض النظر بقى عن أي حاجة هتحصل بعد
كده، وعادةً العبد المقبول سيكون موفق إلى أن يلقي الله.

أضرب لكم مثال يبين الفرق بين قبول العمل وقبول الشخص
طبعًا جاء في الحديث:

(أن الله إذا أحب عبدًا نادى جبريل إني أحب فلانًا فأحبه فيحبه
جبريل، ثم ينادي جبريل في أهل السماء فإن الله يحب فلانًا
فأحبه، ثم يوضع له القبول في الأرض)

هو نفسه بقى عبد مقبول، بس هديكم مثالين يعني إيه عبد مقبول؟
يعني إيه عبد معدي بالبلدي كدة عدى خلاص عدى خلصت.

■ حاطب ابن أبي بلتعة رجل شهد بدرًا، قبل فتح مكة عمل
حاجة مش كويسة، عمل حاجة غلط جدًا جدًا، أرسل إلى أهل
مكة كتاب.. خطاب فيه يُخبرهم أن النبي صلى الله عليه وسلم
جاي يفتح مكة، والنبي عليه الصلاة والسلام جاله الوحي
أخبره بالموضوع ولحق الجواب قبل ما يوصل لمكة، جاب
حاطب ابن أبي بلتعة ليه عملت كدة؟ ليه عملت كدة؟ إزاي
تقولهم إن إحنا جايين؟ فكان السبب إيه بقى؟

حاطب مش من أهل مكة أصلًا، حاطب كان عايش في مكة بس
هو مش من أهل مكة، مش من قريش، وكان ولاده وأهله وأسرته
عايشين في مكة، فهما عايشين في مكة ملهومش عيلة، ملهومش
ضهر، ملهومش سند، ملهومش حد، فهو خاف لو المسلمين دخلوا
مكة.. كل واحد من الجيش الإسلامي ده ليه ضهر في مكة فمحدث
هيقدر يعتدي على أسرته، لكن هو حاطب قال ممكن يموتوا أسرتي
لإن أنا مليش حد فأنا هعملهم هكتبلهم كدة كاني يعني قولت حاجة
عشان لو حصل في الأمور أمور يفتكروها لي فميقتلوش أسرتي،
هو دماغه جابته كدة يعني، طبعًا اللي عمله كبيرة من الكبائر
مصيبة كبيرة، فهو قال للنبي عليه الصلاة والسلام كدة، قال يا
رسول الله هو ده اللي عملته والله ما فعلت ذلك كُفْرًا ولا نفاقًا ولا
ردة عن الإسلام، فقال النبي عليه الصلاة والسلام صدقت.. فعلاً
شهد له أنه صدق، قاله أنا عارف إن انت صادق في إيمانك، وانت
مكدبتش عليا.

لكن عمر رضي الله عنه قال: يا رسول الله دعني أضرب عنق هذا
المنافق، فقال النبي عليه الصلاة والسلام: يا عمر إنه قد شهد بدرًا..
إنه قد شهد بدرًا، ولعل الله قد اطلع على أهل بدر فقال: اعملوا ما
شئتم فقد غفرت لكم.. اعملوا ما شئتم فقد غفرت لكم.

وهذا معنى إن العبد نفسه قُبِل، أي حد كان في بدر خلاص، اليوم ده.. ده عبد مقبول إحنا مش هنتكلم بقى دلوقتي في تفاصيل أعماله خلاص العبد ده عدى، هذا عبد مقبول، وسيستمر مقبولا عندي إلى أن يلقاني.

إيه العمل اللي أقدر أعمله يارب عشان آخذ الميزة دي؟ أكيد لازم أعمل حاجة كبيرة أوي.. حاجة مميزة، هقولكم مثال تاني.. انتوا بتحبا القصص وأنا بحبها القصص برضو.

عثمان رضي الله عنه في يوم أخذ الكارت ده.. كارت القبول

■ كان النبي عليه الصلاة والسلام واقف على المنبر وكان يجهز جيش والجيش كان مصاريفه كثير ومحدث قادر على المصاريف ديت، فقال النبي عليه الصلاة والسلام: مَنْ يُجهز جيش العسرة وله الجنة؟ فقام عثمان وقال: عليا مائة ناقة بأقتابها وأحلاسها، يعني باللي عليها.

مائة ناقة تساوي كام دلوقتي؟

مائة ناقة دلوقتي تساوي على الأقل ثلاثة مليون جنيه، على الأقل ثلاثة مليون جنيه ودي مش ناقة اللي هي بتتاكل وكدة لأ دي بتسافر يعني أغلى، وباللي عليها بالأكل بالشرب بالأسلحة، يعني بنتكلم في خمسة مليون جنيه، كدة أول طلعة منه خمسة مليون جنيه تبرع للجيش.

فقال النبي عليه الصلاة والسلام لسه برضو الموضوع مزنق شوية، فقال: مَنْ يُجهز جيش العسرة وله الجنة؟ فقام عثمان وقال: عليا مائتي ناقة بأقتابها وأحلاسها، يعني باللي عليها، ثُمَّ قَالَ النَّبِيُّ عَلَيْهِ الصَّلَاةُ وَالسَّلَامُ: مَنْ يُجهز جيش العسرة وله الجنة؟ فقام عثمان وقال: عليا ثلاث مائة ناقة بأقتابها وأحلاسها.

يعني راجل وهو قاعد كدة طلع عالآقل عشرة خمستاشر مليون
جنيه صدقة لجيش العسرة، فابتسم النبي عليه الصلاة والسلام
ونزل من على المنبر وهو يقول:

"ما ضرَّ عثمان ما فعل بعد اليوم"

خد بالك كلمة بعد اليوم.. إذا قبل اليوم ده كان غير بعد اليوم! بعد
اليوم ده عثمان صار عبد مقبول بذاته خلصت قصته اليوم ده
خلاص هذا العبد سيكون موفق إلى الأبد، سيلقى الله على خير.

يبقى إحنا عندنا درجتين عمل يُقبل وعامل يُقبل أنا بقى عايز أطلع
من درجة قبول العمل إلى درجة قبول العامل نفسه، ياترى إيه
العمل اللي تقدروا تعملوه وإيه البذل اللي أقدر أبذله إن أنا يحصل
في يوم من الأيام يتكتب إن أنا عبد مقبول عند ربنا؟

أكيد الموضوع محتاج مجهود.. منعرفش ممكن حاجة بسيطة ربنا
يقبلها وتتقبل بيها أنت، وممكن تحتاج مجهود كبير عشان توصل
لدرجة ديت، بس الخلاصة يعني إن دي خاطرة كانت ملحقة بقصة
شهر شعبان إن إحنا كل شغلنا دلوقتي في القبول مش كده! يبقى
إحنا عايزين نركز فيما يُستقبل في قبول العمل في اللي جاي بقى،
نهتم بقبول العمل عشان ييجي شعبان يبقى حاجة زيادة بقى، نزود
بقى تمام؟

هل أنا أقدر أعرف إن عملي مقبول ولا لأ؟

مستحيل تقدر تعرف، لكن هذا له علامات.. قبول العمل له علامات
وقبول العمل له أسباب، يبقى المرة الجاية هنتكلم في موضوعين:

- الموضوع الأول:

ما هي علامات قبول العمل؟

وما هي أسباب قبول العمل؟

انتظرونا إن شاء الله الاثنين القادم بإذن الله سبحانه وتعالى هنتكلم
على علامات وأسباب قبول العمل، يارب يبارك فيكم ويرضى
عنكم، أنا سعيد جدًا باللقاء اللطيف النهاردة، نسأل الله أن يتقبل منا
ومنكم صالح الأعمال، بصوا حتى إحنا بنقول إيه.. نسأل الله أن
يتقبل منا ومنكم صالح الأعمال ويجعلنا من عباده المقبولين الطيبين
الصالحين اللهم آمين.

شكرًا على لقائكم الطيب وتعليقاتكم الراقية وتفاعلكم الجميل نسأل
الله أن يجمعنا وإياكم في جنات النعيم، جزاكم الله خيرًا، ولو في
اقتراح على اللايف الجاي نزوده على الموضوعين دول اكتبوه
وانشروا ومنشن وكدة.

جزاكم الله خيرًا وأشوفكم على خير، سلام الله عليكم ورحمة الله
وبركاته.

لا تنسونا ووالدينا من صالح دعائكم.